

OKRUŽNOM SUDU U DOBOJU
-Sudija za prethodno saslušanje-

Na osnovu člana 43. stav 2 tačka z) i člana 241. stav 1. Zakona o krivičnom postupku RS, podižem

OP T U Ž N I C U

PROTIV:

SKELIĆ HARISA zvani „Skelo“, rođen 1965. godine u Derventi,

ŠTO JE:

Kršeci pravila međunarodnog prava, sadržana u odredbi člana 3. stav 1 tačka a) IV Ženevske konvencije o zaštiti građanskih lica za vrijeme rata od 12. avgusta 1949. godine i odredbi člana 13. stav 2 u vezi sa članom 4. stav 1 i 2 tačka a) Dopunskog protokola uz Ženevske konvencije od 12. avgusta 1949. godine o zaštiti žrtava nemeđunarodnih oružanih sukoba od 08. juna 1977. godine (Protokol II), za vrijeme oružanog sukoba u Bosni i Hercegovini između organizovanih oružanih snaga Vojske Republike Srpske, s jedne strane i Armije Bosne i Hercegovine i Hrvatskog vijeća odbrane (HVO), s druge strane, u periodu maj-juni 1992. godine, u logoru u vojnom skladištu (hangaru) Rabić i Polje, vršio fizičko zlostavljanje zatvorenika, civila srpske nacionalnosti nanoseći im povrede tjelesnog integriteta, na način da je:

1. U mjesecu maju 1992. godine, u logoru u vojnom skladištu (hangaru) Rabić, zajedno sa za sada nedostupnim S.M., fizički zlostavljao oštećenog M.B., na način da je u više navrata oštećenog izvodio do školske klupe, koja se nalazila u hangaru i naredio mu da stavi ruke na sto, da bi nakon toga debelim kablom za struju koji mu je bio vezan za ruku tukao, te kada bi oštećeni pao na koljena od bolova nastavio bi ga tući po leđima i glavi, a oštećenog je u više navrata izvodio ispred hangara, te istog tukao rukama, nogama i kundakom puške po cijelom tijelu, zatim postrojavao ga sa ostalim zatvorenicima i tukao kundakom puške u predjelu grudi, te je tim svojim radnjama oštećenom M.B. nanosio povrede tjelesnog integriteta;
2. U maju mjesecu 1992. godine, u logoru u vojnom skladištu (hangaru) Rabić, fizički zlostavljao oštećenog Č.I. na način da ga je jedne prilike pitao šta radi srpska vojska u Brčkom sa njihovim ženama, pa kada mu ništa nije na to odgovorio, oštećenog udario palicom i nogom po tijelu nekoliko puta, a također, jedne prilike ga je u hangaru šamarao, nanoseći mu na taj način povrede tjelesnog integriteta,
3. U maju mjesecu 1992. godine, u logoru u vojnom skladištu (hangaru) Rabić, zajedno sa za sada nedostupnim S.M., fizički zlostavljao oštećenog S.M., na način da ga je prisiljavao da određeno vrijeme stoji na jednoj nozi, te kada bi neko ušao u hangar da pjeva ustaške pjesme, da sjedi i leži na golom betonu prethodno polivenim vodom, te u više navrata tukao oštećenog po cijelom tijelu, nanoseći mu na taj način povrede tjelesnog integriteta,

4. U junu mjesecu 1992. godine u logoru u vojnom skladištu (hangaru) Rabić, zajedno sa drugim za sada NN pripadnicima HVO-a, naredio zatvorenicima među kojima je bio i oštećeni M.V. da se skinu goli, te su ih udarali palicama, rukama i nogama po cijelom tijelu, od kojih udaraca su zatvorenici padali u nesvjest, a nakon toga u logoru Polje fizički zlostavljao oštećenog M. V. na način da ga je udarao kundakom od puške po rebrima, a iz razloga što je isti odbio da ide na kopanje rovova u okolni logora, obzirom da je bio iscrpljen, gladan i žedan, nanoseći mu na taj način povrede tjelesnog integriteta,

dakle, kršeći pravila Međunarodnog prava za vrijeme oružanog sukoba učestvovao u nanošenju povreda tjelesnog integriteta,

čime je učinio krivično djelo ratni zločin protiv civilnog stanovništva iz člana 142. stav 1 u vezi sa članom 22. Krivičnog zakona Socijalističke Federativne Republike Jugoslavije.

OKRUŽNI JAVNI TUŽILAC

Napomena:

„Podizanje optužnice protiv određene osobe ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom sudskom presudom ne utvrdi njegova krivica“.